

道光庚寅重修

南宮縣志

第六冊

本衙藏板

河北省南宮市文化遺產
南宮市國家檔案館翻印



南宮縣志卷十二

藝文志

前編上

班固漢書載藝文志各史因之邑志之有藝文所以
記一邑之文獻也今倣靈壽志關一邑之風俗政教
者爲前編關一人之學問經濟者爲後編無甚關涉
雖美不錄有條不紊開卷了然南邑文獻彬彬足觀
矣志藝文

疏

覆漳河分流疏

節錄

大學士李光地

安溪

現在漳河分爲四支一支自直隸大名府之魏縣元城縣

流至山東館陶縣地方歸衛入運一支由直隸廣平縣至山東邱縣地方復分爲二其一俗呼老漳河自邱縣東北分流經直隸之威縣南宮棗強景州武邑阜城交河等地方至青縣杜林木村與完固口之支流合至鮑家嘴歸運又其一俗呼小漳河亦自邱縣西北分流經直隸之鉅鹿廣宗平鄉至寧晉與滏河會又經束鹿冀州與滹沱河會由衡水至獻縣完固口復分爲兩支一支自完固口流至青縣會老漳河至鮑家嘴歸運一支經河間大城爲子牙河出王家口歸淀查漳河現在末流所分四支三支歸運一支歸淀然歸運三支水勢頗弱其歸淀一支水勢獨強

約其水勢三支之水僅可以敵一支是則此時漳水一半歸運一半歸淀運道既無難受之虞于牙河亦得分殺之勢誠有如此

聖諭所云者臣等竊觀此時水勢惟寧晉冀州會滏河滹沱河

一支最爲深通其歸館陶及青縣入運之兩支水勢頗淺或恐將來淤塞臣等議得應令所經由各地方官每年於水未發時分段挑濬臣等按季察視務令此兩支俱疏通無滯以殺小漳河之勢如遇水大時仍用挑水壩等法逼水分流庶幾北不至挾滹沱以侵田南不至合衛河以害運

整頓書院疏

直隸
總督 松筠

奏爲直省書院廢弛現飭認真整頓以重文教以維風俗
仰祈

聖鑒事竊查書院之設原爲造就人材砥礪士習居講席者必
須老成宿望經明行修方可爲多士模範如果各處書院
延請講席得人與肄業生徒隨時講習討論不但文風可
期日有起色且使鄉村百姓耳聞目見咸知君臣之義父
子之恩風俗亦可漸還淳厚經正則庶民興牧民首務莫
過於此

奴才
仰蒙

恩命署理直隸總督到任後卽體訪通省書院情形廢弛者多

整頓者少緣各處所請院長並非本地之人多係輾轉薦引非關上司情面卽碍僚友交誼少則延請一人多則延請數人終年不到館惟按季支取束脩名曰乾俸又有並非科第出身之人覲居是席流品更爲冒濫歷久相沿恬不爲怪士子旣無訓迪之益州縣徒添耗費之煩不特士習日偷文風不振甚至無知愚頑習教爲匪及逆倫不法者此皆教化不行有以致然也伏思十室之邑必有忠信一州一縣之大不乏積學名儒如直隸武強縣書院向由本地紳士經管故數十年來從未廢弛而士習文風亦甲於他邑嘉慶二十五年深州直隸州知州張杰於到任

後捐俸修理該州文瑞書院仿武強書院照辦添議條規
實力舉行道光元年鄉試卽中式五人可見實心辦理自
收實效亟應通省一律查辦以挽頽習應照武強深州章
程於本地紳士採訪品行端方學問淵博素爲士林所推
重者延聘訓導以本處之師儒而課本處之士子不特口
音相同講解章句士子可以悉心領會且一切風土人情
彼此靡不習慣更可隨時講究於教讀之餘與農夫野
老共譚忠孝之經使家喻戶曉不致作奸犯科洵於士習
民風均有裨益

奴才

商同藩司通飭各屬書院除現有院長在院教課者毋庸置議外其支食乾俸之人概行禁止

其府廳州縣各宜仿照武強深州原定書院條規實力奉
行飭將所延院長姓名出身履歷造冊呈送查考各州
縣並宜循例酌設義學訓課鄉里蒙童至教職本有課士
之責不得兼充仍責成該管府廳州縣督率稽查務使文
風丕變民俗敦龐以仰副

聖主振興文教勤求治理之至意如各州縣並不實力辦理以
致講席虛懸仍前瞻徇情面者據實參處是否有當伏乞
皇上聖鑒訓示再各處書院束脩膏火等項向有額設經費者
亦有捐資發商生息者並各處書院房屋如有坍塌應修
者責成府廳州縣捐資修理至省城蓮池書院現延原任

南宮縣志 卷二十二 四
順天府丞趙未彤品學兼優訓課有方惟書院房屋尙須修整容與藩司商酌另籌妥辦合併陳明謹奏

道光二年二月二十日奉到

硃批所辦甚是另有旨欽此同日奉

上諭松筠奏整頓直省書院一摺所奏甚是各省府廳州縣分設書院原與學校相輔而行近日廢弛者多整頓者少如所稱院長叅不到館及令教職兼充且有叅非科第出身之人覩居是席流品更爲冒濫實去名存於教化有何裨益著通諭各直省督撫於所屬書院務須認真稽察延請品學兼優紳士住院訓課其向不到館支取乾俸之弊永行禁止至各

屬教職俱有本任課士之責嗣後亦不得兼充以專責成於
著各飭所屬如有書院房屋坍塌應修之處卽行修整俾各
士子聚處觀摩以收實效用副朕振興教化至意欽此

記

昭惠靈顯真人廟記

金鄉貢進士呂仲孚邑人

宋元豐辛酉大河決北溢滹沱瀦潦田野是邑也濁流平
隄之激而不能下使民得平土而居非神之力民其魚乎
正隆五年秋大蝗其飛蔽天其食空畝四傍告饑穀暴騰
湧縣人奔禱於祠蝗自散去不留於境是歲也幸以無害

重修昭惠明靈王廟記

元張珌邑人

昭惠明靈王者禘神之名也夏曰嘉平殷曰清祀周曰大禘蓋以歲終合聚萬物而索享之百神從祀於其下故周禮宗伯以醴率祭四方百物成其所收闕其不登牲用少牢禮行一獻用主日也配之以月易曰懸象著明莫大於日月故曰明靈但不知何代所封禘神有八昆蟲居一凡有國者必立其祠而南宮之廟建於城西南隅歲有蟲災則居民致禱甚響應近歲以來或革匠聚賽其中是流俗無知而悞傳也歲久傾圯梁棟榱桷散失殆盡前政多矣皆未慮及尹令子厚王公宰治斯邑六事旣備百廢悉舉慨然感此曰夫禘者所以報本返始息老送終之祭也因

俚俗凡鄙之爲敦紹農勸功之化所以興嗣歲祈年豐養君子於安逸飽適之地也夫何敢後於是乃僦工匠市材木估甌甌買丹雘飲食動用之費不擾於民而人人自爲之伙助仍以社長范士達專董其役新其殿宇輒其行路前門起樓俯瞰周行西鄰扁鵲廟肖像於其中畧如王公之儀其他判神鬼使畧如他廟之像左右凡四不再月而煥然一新功畢懇予文諸石用傳不朽噫誠善事也切觀春秋凡螟螣蝥賊蝗蝻蜚蠊之屬一有害於民者聖人未嘗不書所以示天下與後世爲民父母之道也方今朝廷選擇守令布之郡邑責以六事率皆徒爲文具其於爲民

父母之道恬然莫之加慮是得爲守令之實哉若公者誠可謂得爲民父母之道者也是不可以不書

扁鵲廟記

國子博士康繼禮 邑人

扁鵲渤海鄆人不常厥居今有祠置龍岡之西號曰神應王其山亦以鵲爲號殆趙簡子賜田之所也簡子疾五日不知人扁鵲視之曰血脈治也二日半而寤賜扁鵲田四萬畝趙人爲立廟世祀則廟在南宮者蓋亦有年矣縣中醫流爲主其祀先是藥局高濟以舊構卑陋欲更之屈於物力至元時其孫天明始成厥志乃別營正殿展湫隘爲宏敞易板屋爲壯麗旣訖工請予記其事

舊城儒學記

明大學士商輅

南宮縣儒學舊在縣治東南知縣楊繩卽故址西北改建水樂中復遷於舊宣德間知縣隆英又重建正統閒燬於火時有司成於草創堂齋陋隘歲久浸圯閒有修葺之者不過因循舊規而新之若有待也成化己丑春三月郡守曾達詣學教諭鄭遂以修建爲請曾慨然有興作之意乃諷邑人義民捐貲爲倡第未有任其責者秋九月淳安方中以前玉山令來蒞是邑汲汲以興學校爲務於樽節公私之費度工計庸鑿石陶甓市材於滹沱河擇其合抱以爲梁棟重構明倫堂五間翼以東西兩齋規模宏壯甲於

郡之諸學工甫就緒而方以風憲赴召繼其任者寶雞蕭智克成厥美門牆除道修治殆遍增築號舍益以丹漆經始於庚寅七月落成於明年三月一力一費悉出自公而民若罔知者是役也府貳倡之令尹成之太守邢簡田濟從而獎勸之僉謂學校王政之本人才自出風化攸係誠有司首務也苟學校弗葺則教弗立人才何由而成風俗無由而厚雖欲爲治皆苟而已我國家崇儒重道設學育才無閒遐僻况南宮畿內善地密邇聲教者乎是宜膺百里之寄任六事之責者拳拳奉宣德意以先務爲急使彝倫自我益明風俗自我益厚以期上無負於朝廷建學之

意下無負於有司作興之功不誠斯文之慶哉

劉侯祠堂記

尚書白 鉞 邑人

成化戊戌畿內大雨水清濁二漳溢真定之南宮適當其衝城外舊有隄高堅可恃以歲久無懷襄災有司不戒而民亦謾視之畚鍤者往焉陶埴者往焉日以頽缺交午爲車馬道至是遂倉卒無以禦奔流水如建瓴由南門入直抵北城下爲所障不得去復折而南官舍民居神祠儒校一洗而空之幸水以晝至民盡乘高呼噪然不能救也旣數日稍露洲渚敗瓦斷株鱗次水際其激射處皆成深淵漹漹極目殆類湖濶人始不可奠居矣於時郡守余公瓚